


文章之妙在有自得處而詩其尤者也此



一法雖窮工極思直可欺不知者有識者  
一觀百敗並出矣四明劉良佐先生盡力  
於詩惟石湖范至能獨深賞之每為客言  
客未必領也予曩時數遊四明獨不識良  
佐近迺見其詩百篇卓然自得者何其多  
也如頗識造物意長容吾輩閑日晏猶便

睡犬鳴知有人世事不復問舊書時一看  
一夜催花雨數家臨水村青山空解供望  
眼濁酒不能澆別愁覓句忍飢貧亦樂抄  
書得味老何傷雖前輩以詩得名者何以  
加焉因書其右他日有賞音如石湖者當  
知予言不妄云慶元六年四月己亥山陰  
陸游序

夫詩何為者也尚其辭而已矣曰善詩者  
去辭然則尚其意而已矣曰善詩者去意  
然則去辭去意詩安在乎曰去辭去意而  
詩有在矣然則詩果焉在曰嘗食夫飴與  
荼乎人孰不飴之嗜也初而甘卒而酸至  
於荼也人皆病其苦也然苦未免而不勝  
其甘詩亦如是而已矣昔者暴公譖蘇公

而蘇公刺之今求其詩無刺之、辭亦不  
見刺之、意也乃曰二人從行誰為此禍  
使暴公聞之未嘗指我也然非我其誰哉  
外不敢怒而其中媿死矣三百篇之後此  
味絕矣惟晚唐諸子差近之寄邊衣曰寄  
到玉關應萬里戍人猶在玉關西弔戰場  
曰可憐無定河邊骨猶是深閨夢裏人折

揚柳曰羌笛何須怨楊柳春光不度玉門  
關三百篇之遺味黯然猶存也近世惟半  
山老人得之予不足以知之予敢言之哉  
今四明劉君叔向寄其父頤菴居士詩藁  
命予為之序放翁陸務觀既摘其佳句序  
矣予尚何言哉偶披卷讀至寂寞黃昏弔  
愁影雪牕怕上短檠燈又獨與梅花共過

冬淡月故移疎影去又睡魔正與詩魔戰  
牕外一聲婆餅焦使晚唐諸子與半山老  
人見之當時一笑曰君處北海吾處南海  
不虞君之涉吾地也何故居士名應時字  
良佐嘉泰元祀六月戊戌廬陵楊萬里序

頤菴居士集目錄

卷上

古詩 五七言

投魏先輩二首

次韻聞人參議來賢巖

寄張武子

辛丑季冬雪中作

讀陸放翁劍南集

木犀

感事二首贈周子壽

史太師病愈且誕辰伊迺作古詩

三首寄之

讀漢史

和史魏公酬北壽老

冬夜

山行

律詩 五言

幽居

江村

春暮

獨飯

舟行

別李簿

入夜

旅舍

耳聾

生日

登樓

山居三首

辛亥長至夜

卷下

律詩 七言

秋夜書懷

杜宇

酬平上人

夜坐有感

喜會故友

遣懷

送張尉至丈亭

過田家

次韵范至能尋梅

喜兒輩歸寧

春晴

病中偶書

聞范至能丐祠

祐上人製紙帳作詩謝之

九日

石菖蒲

山行



雨後訪田家

病中和蔡堅老

絕句七言

山居

秋郊

過飛鳧別業

史魏公東湖別墅二首

早行

春晚二首

萱草

開牕

西郊二首

懷瑩上人

梅林即事

懷怡雲平老三首

雨中招陳正老二首

曹直夫水石短軸二首

義上人歸自武林戲作四偈

謝香山禪師惠水巖新茗二首

春日三首

頤菴口占

遣懷二首

縣庠直舍

早起

即事

送人還會稽

郊行三首

霞外亭三首

雪夜二首

山中三首

聞張逸人計二首

頤菴居士集目錄

頤菴居士集卷上

四明劉應時

良佐

古詩 五七言

投魏先輩二首

長驅決文陣 眇古百戰場  
朔風吹梅花 塞日淡無光  
一將功業成 千屯草木香  
高談靜寰宇 袖手歸巖廊  
纍纍腰下印 奕奕看

間黃霖雨四海心鼎魚衆口嘗園林多勝  
事豈久居其旁縱令猿鶴怨出處庸何傷  
跼飛鳶墜瀝風瓢聲青冥不折桂澗  
阿甘采苓踉蹌憶束髮忽焉迫衰齡嚼蠟  
心忘味胡為羨久生藹春空雲聚散無  
根蒂縱得屠龍術孰為芑桑計稽首問弥  
伽輪宇煩舉似

次韻聞人參議來賢巖

僊事不可考靈踪閔幽微我懷采芝人寤  
寐心目怡松陰月華冷竹露晨光晞福地  
萃七賢語屑落霏鳳鳴悵莫聞鶴駕邈  
難追斲石出秀句神物尚憑依春茲玄雲  
英挺然柱石姿孰能鞭萬牛挽此歲寒枝  
臧孫信有後深慰魯人思

寄張武子

霽月耿東南流光淨如洗幽人懷夜光掬  
水弄清泚春雲多態度蒸縵出山巒舒卷  
無定踪形容勞遠目可人古錦囊多乎斯  
二者造物發天藏筆端妙陶冶我具擇法  
眼僅得窺一斑恨無餐玉法謾入藍田山  
別來歲月換倏如飛鳥過升沈不足數交  
誼果何如夜牕浥露氣策策秋聲高假寐  
發永歎念遠心忉忉

辛亥季冬雪中作

凍雲橫山風卷沙槎身古木鳴寒鴉長空  
黯淡常如晚煙景淒迷亦自佳開牕未及  
一食頃剪水俄包六出花須臾勢欲傾天  
地粲然枯卉皆瑤葩江村景物堪入畫漁

翁蕩漿依枯葭重裘肥馬誰氏子銀鞍蹠  
躑山路斜矐儒事業政不惡擁書至樂何  
以加團團共向楮拙火溫然春意生吾家  
不能半夜縛元濟亦嬾扁舟泛若耶酒牕  
入竹有餘韻頓覺詩興清無涯

讀放翁劔南集

少陵先生赴奉天烏帽麻鞋見天子乾坤

瘡痍塞目慘人煙蕭瑟胡塵起八月之吉  
風淒然北征徒步走三川夜經戰場霜月  
冷纍纍白骨生蒼煙五載栖客蜀郡騎  
驢日候平安信喜聞諸將收山東拭泪一  
望長安近瞿唐想見放船時回首夔府多  
愁思蜀人至今亦好事翠珉盛刻草堂詩  
放翁前身少陵老胸中如覺天地小平生

生一飯不忘君危言曾把姦雄掃公以剛定官輪

對論楊和王事周流斯世轍已環一笑又入劔南

山酒杯吸盡錦屏秀孤劔聲鏘峽水寒萬

丈虹霓蟠肺腑射虎割鯨時一吐我雖老

眼向昏花夜牕吟哦雜風雨少陵間關兵

亂中放翁遭時樂且豐飽參要具正法眼

切忌錯下將毋同茶山夜半傳機要斷非

口耳得其妙君不見塔主不識古雲門異

時衣鉢還渠紹

次韻李仲南木犀

幽人何所為兀然坐詩窮萬事不復理吟

哦四壁空少皞從西來天宇淒其風羣芳

漸搖落桂子開墻東寒蟾駕壁月老翠高

峯景物爾獨勝色香誰與同豈藉紅裳

女徒費丹砂工不受黃金思桃李誰爭雄  
風漪卷輕碧斷霞曳微紅清風襲衣袖薄  
采喧兒童王孫亦好事乘興賞珍叢笑掬  
黃金蕊糝綴光玲瓏山村酒可筍恍如入  
新豐胡不抱琴去一飲醉其中露濕月華  
冷風約零雨濛靜言參鼻觀身在廣寒宮

感事贈周子壽二首

毛遂處趙庭囊穎初不起昭君在匈奴畫  
工一夕死取士無取名之下非真士哀絃  
有餘音為君聊洗耳

丹丘有鸞鳳天朝思羽儀祥風挽不前簫  
韶將致之我生幸良覲九苞容一窺矯首  
望阿閣自笑槍榆卑

史太師病愈未果走賀誕辰伊迺



作古詩三首寄之

真隱出人間了此一大事堯舜既授邊  
障息烽燧袖手辭釣衡澹然不色喜高卧  
北山雲戲掬西湖水

真隱愛西湖居然來卜宅春波自溶々秋  
林何策々密迤城市居負與囂塵隔開牕  
放月入好句來几席

真隱道骨堅能禦陰陽寇不藉盧扁術自  
得喬松壽香馥東籬菊樽餘北海酒裁詩  
千百篇年々登衮繡

讀漢史

彭蠡萬頃波胥江八月濤所蓄盖有素末  
流故滔々君子貴養源毋事駕說勞漢祖  
過百人心動疑貫高田孟天下士其忍負

趙敖處死且不難視身如鴻毛髮鉗吾何  
畏義命豈忍逃乘輿忽至止興運有所遭  
俛首與之語議論誠英豪回視漢廷臣誰  
能出尔曹即日拜守相泥塗升九臯大閑  
不可踰四維在所操我觀忠義傳榮如華  
袞褒置君如奕棋百歲猶腥臊

和史魏公酬北山壽老

黃髮了國事歸來雙頰紅園林白日靜樂  
事何豐融更許柏庭友來依春桂叢境勝  
香山遠辭高支遁同眷茲達尊地綽有古  
人風梅林洗煩暑霽色摩蒼空煙霞琢秀  
句咀嚼味無窮徒紀盛山燕來羨昌黎公

冬夜

濁酒有真味軟火如春和跼居身嬾動卒

歲養微痾世境淡無染心源湛不波舍尔  
短檠樂如此良夜何

山行

春光淡心目乘興聊躋攀頗識造物意長  
容我輩閑橫拖拄杖去笑折梅花還彼哉

鐘鼎樂不在山林間

律詩 五言

幽居

煙重柳腰困雨肥梅臉酸夜牕無鎖鑰晨  
氣濕衣巾日晏猶便睡犬鳴知有人西家  
新釀熟祀竈請比鄰

江村

前山疑抹黛多稼欲成鑿水滿蛙登岸槁  
危馬盛蹄風高帆腹壯雨霽月眉低杖屨

投村舍兒童指舊題

春暮

愁裏青春去年來白髮加細書欺老眼軟  
飯慙衰身寧夢穴中蟻不疑杯裏蛇南牕  
時隱几一縷篆煙斜

獨飯

雲破日將西村深雞自啼撐船傍林樾獨

飯寓招提山柿淡無味園蔬嫩可剗滿抄  
雲子白心事愧鋤犁

舟行

小艇出前浦槐陰覆小橋雲垂疑有雨水  
穩不通潮山色綠自足汀花細可描枕書  
篷底卧款乃認歸樵

別李簿

執手江亭晚回驂澗谷深碧山  
嶠落照煙樹鎖愁心空擣黃  
金泪誰知白石音殷勤  
囑魚雁他日莫浮沉

入夜

入夜雨聲細小牕燈影寒  
僻居成嬾惰飽食幸平安  
時事不復問舊書時一看  
欣然會心處香燼一爐殘

旅舍

草市欲黃昏吾行恰到門  
僕夫思憩息燈火喜温存  
一夜催花雨數家臨水村  
征途雖得句默坐與誰論

耳聾

嘆昔英豪氣俄成一老翁  
近年頭盡白日耳猶聾  
品位無丞職是非隨曉風  
難陀

能反聽梢境已消融

生日

屏迹衡門下哀遲愧始生兒曹於此夕杯  
酒致歡情來日苦無幾餘生累漸輕樂親  
惟養志外物本非榮

登樓

圖書梁東壁星斗下西樓湍座襟懷爽一

輪風露秋雲山遺古意江漢洗詩愁更欲  
騎黃鶴相隨汗漫遊

山居三首

行年當耳順涉世尚心勞倦矣歸三徑  
然愧二毛留詩羞若供為客釀松醪  
晚照橫籬落呼兒課楚騷

小小園林畔蕭蕭叢薄間茅簷  
巖頗幽隱竹

徑自回環犬吠溪頭客日  
嚼牕外山遺編  
淡相對身世覺高閑

雨濕茅茨暗日長天氣  
溫心閑忘物累足  
嬾出柴門風靜收雲脚  
山高露月痕兒童  
展編簡燈火又黃昏

辛亥長至後二首

老去驚時序冬溫少  
江陰心閑知物理陽

復見天心聖主成郊  
禮寰區迎德音病夫  
思贊善擁褐發長吟

遙想清臺上已書雲  
物祥自慚身老大漸  
喜日舒長芹泮三益  
友芸牕一炷香此間  
無俗物貧病亦何傷

頤菴居士集卷上

頤菴居士集卷下

律詩 七言

秋夜書懷

四明劉

應時

良佐

金行肅物歲功成銀漢西斜夜氣清  
淡月似為吾輩歎短檠深見古人情  
候蟲促織巧能語露葉墮林微有聲  
自笑何為法天



運祇將心事卜前程

杜宇

花殘葉密過芳春  
江北江南煙水昏  
何處飛來惱歸客  
小牕夢破正消魂  
月明聲在溪橋側  
雨後人行綠樹村  
啼得崔郎腸欲斷  
桃花顏色悵何存

酬平上人

比隣雞犬寂無聞  
煙際微風起夕曛  
腸斷梅飄千樹玉  
眼寒麥浪一溪雲  
拙於生計無如我  
老矣情親獨有君  
佇立茆簷一搔首  
扶春夢月與誰分

平有夢月  
扶春二亭

夜坐有感

躬耕谷口未為貧  
安得生涯似子真  
平日固知窮有鬼  
年來更覺老欺人  
短檠頗怯

蠅頭字蠹簡時指鼠迹塵兒女豈知黃卷  
樂苦嫌無補廢精神

喜會故友

邂逅相逢不作難地爐握手話悲歡朝廷  
已誦相如賦朋舊猶嗟范叔寒剪、秋花  
多勝韻纍、霜實尚微酸小春天氣能來  
否同訪山家省箸盤

遣懷

自笑平居氣吐霓桑榆暮景轉淒迷縱云  
舉世無青眼敢忘終身誦白珪風蕊弄香  
依水出凍雲銜雪壓簷低兒童不識人懷  
抱苦傍寒牕讀鳳兮

送張尉至丈亭

丈亭之前暫艤舟寒濤拍岸江煙收青山

空解供望眼濁酒不能澆別愁春到疎籬  
梅蕊破帆歸別浦浪花浮分携情緒剪不  
斷有媿悠、波上鷗

過田家

鳩鳴桑樹雨還來且得農夫笑口開雖曰  
田疇多再植定須天氣作重梅江魚欲買  
全無錫社酒堪筍旋漉醅更遣兒童炊麥  
飯殷勤相勸且徘徊

次韵范至能尋梅

藜杖扶人趁雪乾玉虹倒影落前灘竹籬  
短、溪頭路雲木荒、日暮寒每愧清香  
留我住苦無佳句與人看孤吟不忍空歸  
去霜月侵衣興未闌

喜兒輩歸寧

凜、寒威欲挾綿稜、病骨只忻眠燈花  
璀璨人歸後雲色蒼茫雪作天百歲光陰  
寧有幾四時飲啄且隨緣擁爐莫厭團團  
樂節物崢嶸又一年

春晴

簾幙低垂清晝長弄晴梅柳拂隣牆春光  
潑眼何明媚幽鳥窺人自發揚覓句忍飢  
貧亦樂鈔書得味老何傷舍南舍北無人  
到閉閣時焚一炷香

病中偶書

老來懶與俗浮沉何況厭、病日侵身外  
閑愁摠餘事世間無藥勝安心雨餘秋色  
淒涼冷風弄晚雲晴復陰習氣難除還自  
笑小牕時有短長吟

聞范至能丐祠二首

自是清都紫府人偶來應見宰官身諸公  
有類隨陽鴈此老方為透網鱗轍已償  
行去脚擁書更結未來因石湖雖有閑風  
月誰許滌償寂寞濱

士伸知己近來無得此吾慚上大夫酷愛  
新詩成異遇每於廣坐語諸儒既紓北顧

思歸矣聞返西州有是夫便欲拏舟去相  
訪推蓬邀月夢江湖

祐上人製紙帳作詩謝之

老來何物是生涯一榻脩然亦自佳睡裏  
山禽弄霜曉夢回明月上梅花頗知常侍  
嫌烏布未羨先生坐絳紗最愛洒總風雪  
夜道人施法復何加

九日

吟懷祇恐負嘉期，不憚登高脚力疲。  
滿眼關愁淡秋色，長箋入手粲明珠。  
興來不省風吹帽，醉後何愁酒濕衣。  
欲和藍田無好語，笑接黃菊帶香歸。

石菖蒲

十年夢不到丘壑，清坐喜看寒瘦姿。  
玉立

一峯森黛色，虬蟠九節漾風漪。  
消、月露欲生處，漠、溪雲未散時。  
却笑輕狂桃李眼，矍仙風韻不能窺。

山行

瘦藤慚愧肯相携，不怕微茫雪意低。  
晚照荒、迷遠岫，濕雲漠、度前溪。  
雖無酒力禦寒色，且向梅花覓舊題。  
漫說玉堂多勝

事何如丘壑卜幽棲

雨後訪田家

一雨及時晴又佳  
江村農父話誼譁  
旋炊麥飯非常飽  
笑指苗田不用車  
有眼何曾識朝市  
逢人只喜話桑麻  
此間賸有漁樵地  
容我旁邊著一家

病中和蔡堅老

老去光陰苦不多  
孰堪疾病數驅磨  
也知溪上春光好  
奈尔牀頭藥裹何  
日永茶甌頻索喚  
睡餘詩眼旋揩摩  
客來怕說人間話  
古井須知已不波

絕句 七言

山居

淺、溪流短、籬碧於深處  
小茆茨想無

俗子知踪跡小款梅花細說詩

秋郊

柿葉飄零滿屋除半山啣日落丘墟睡餘  
不覺西風急亂我牕前數板書

過飛鳧別業

垂空小雨濕梅花一嶺穿雲石逕斜燕子  
飛時春欲暮斷橋煙水渺無涯

史魏公東湖別墅二首

雲抹山容疑潑綠月涵波影自搖金丈夫  
出處如雲月猿鶴安能識此心  
徜徉綠野春波上徙倚石樓煙靄間只恐  
蒼生待霖雨未容謝傅老東山

早行

登輿睡思尚昏斗柄斲山月在門雞犬



未鳴潮半落草蟲聲在萱花村

春晚二首

天氣清和晴復陰  
醪醖堆雪笋抽簪  
誰知老去傷春意  
自把茶甌當酒斟  
子規聲裏正斜陽  
風過斷橋流水香  
頗恠影侵書帶綠  
弄晴柳色過隣牆

萱花

碧玉長簪出短籬  
枝頭腥血耐炎暉  
北堂花在親何在  
幾對薰風泪濕衣

開牕

檐前分得小牕明  
便覺條然眼界清  
香燼一爐書滿几  
世間何物可關情

西郊三首

紫槿綠籬愁意深  
斜陽墟落動秋砧  
筆端

有口江湖遠莫寫干時老子心  
薄雲斜日媚平川一老來耕刈後田向晚  
歸牛尋熟路擺頭昂鼻不須牽

懷瑩上人

半路梅花作峭寒懷人無地著愁酸幽居  
獨得春風力補綴林塘漸可觀

梅林即事四首

入眼溪山記舊遊春風籬落只供愁斷腸  
蕪、飄香雪短竹一聲誰倚樓

瘦減腰圍儘不妨豈堪三篾束枯腸自憐  
尚有風流債酷愛斷橋流水香

藜杖緣溪轉小橋背風深處似相招兒童  
指點皆驚怪喚作枝頭雪未消

竹塢松溪雪半埋興來無處著吟懷茅檐

盡出橫斜影寂寞黃昏月上堦

懷怡雲平老三首

江湖夢斷十年餘尚記寒牕誦子虛回首  
扶春堂下路別來風月果何如

晚陰分暝與幽牕心旆搖、不可降隱几

正為丘壑夢半隨柔櫓過滄江

柔桑已密吳蚕老簾幙低垂燕子飛想見

石欄斜點筆海雲深重濕山衣

曹直夫水石短軸二首

奔流出峽響如雷筆力浮天亦壯哉吳蜀

興亡千古恨白鷗時逐浪花來

清風歛霽入巴山春漲攘人釣月灣欠箇

小舟青箬笠著儂長在水雲間

義上人歸自武林戲作四偈

十載江湖寄此身足香慣踏軟紅塵夢回  
一笑知何有穩卧家山寂寞濱

行脚從來笑趙州草鞋踏破竟何求百千  
三昧無窮義不出願菴拄杖頭

老去居然懶出門故鄉零落暗消魂歲寒  
道義唯松竹伴我東溪沙水村  
身世總為閑伎倆生前須了惡因緣把茆

約子歸雲壑品字柴頭坐說禪

謝香山禪師惠水巖新茗二首

雨暗水巖春意濃尚思采、隔玆叢睡魔  
正壓眉楞重玆重南屏信息通

趙州古佛不同時賴有斯人慰所思搜攪  
枯腸無一物夢回日影上花枝

春日即事三首

春來九雨一日晴  
藜杖扶人出戶遮柳色  
宵如衰俗眼向人還似舊時青

野草閑花無姓名  
疎籬幽徑漸敷榮  
貧居閑盡人間事  
只有東風不世情

二月風光漸惱人  
蒙茸細雨濕花唇  
可憐病目長憔悴  
坐看紛紛萬卉春

頤菴口占

健即觀書困即眠  
飯餘香燼溼茶煙  
客來莫說人間話  
我是清貧無事仙

遣懷二首

小桃無力困東風  
似整殘粧睡思濃  
老子愁腸正如結  
蒼苔滿地點殷紅  
蕭、叢薄倚頽垣  
頗覺舒長春晝喧  
搜攪枯腸無好語  
等閑日影過前軒

縣庠直舍

午日已過人寂、虛齋獨坐竹蕭、睡魔  
正與詩魔戰、牕外一聲婆餅焦

早起

斗轉星稀夜欲闌、月魂斜墮屋頭山、雞聲  
喚起十年事、盡在吟牕一枕間

即事

暖雲芳草媚晴川、花正嬌春柳欲眠、老景  
侵尋生事拙、舊巢歸燕自相憐

送人還會稽

稽山佳趣勝蓬瀛、橘里漁樵畫不成、我欲  
鑑湖分一曲、煩君先與白鷗盟

郊行三首

少日襟懷眇古今、凶年樂歲不關心、自憐

老去多憂國白水田頭問淺深  
西郊穡事欲迎秋旱魃肆兇猶未收卷地  
黑風吹雨散稻花飄蕩滿天浮  
茫、阡陌起黃埃喜望片雲銜雨來霖霖  
未施風不息依然白日照樓基

霞外亭二首

詩眼眈、細八荒小亭徙倚濕山光飛鴻

影落遙岑外興與飛鴻更渺茫  
數椽屹起枕林丘雲葉蕭、萬木秋一縷  
殘紅曳微日渺然天際見歸舟

雪夜二首

迎春寒色愈嚴凝小閣爐殘冷欲冰寂寞  
黃昏愁弔影雪牕怕上短檠燈  
浮雲著眼不留踪獨與梅花共過冬淡月

故移疎影去，斷雲誰杵暮山鐘。

山中三首

始看紅紫上花梢，倏忽春光半已消。最是  
幽窗斷魂處，杜鵑啼月過山腰。

伏櫪已無千里志，卧雲聊作一枝棲。田翁  
笑喜桑麻長，山北山南雨意低。  
年來世路愈間關，且喜兒童放我閑。百歲

光陰無一半，菜衣能得幾時斑。

聞張逸人訃二首

去馬來牛閱幾秋，濁涇清渭只同流。斷絃  
掛壁知音去，旋撲塵編有許愁。

梅子黃時麥已秋，野塘高下水爭流。小牕  
聲切哀鴻雁，添我懷人一段愁。



頤菴居士集下



